

दिनांक 24.02.2025

समय: 18.45 बजे

- प्रधानमंत्री नरेन्द्र मोदी किसान सम्मान निधि री 22 हजार 700 करोड़ रुप्या ऊं बत्ती रकम जारी कीनी—कहयो—सरकार री लगातार कोशिशां ऊं कृषि जिंसां री दिसावर मांय बिकी बधी।
- विधानसभा मांय रार बरकरार— कांग्रेस रा निलम्बित विधायकां री बहाली माथे हालात साफ नी व्हया।
- प्रयागराज महाकुम्भ मांय महा शिवरात्रि रे मौके मोटी तादाद मांय जातरुआं रे आवण री संभावना ने ध्यान राखता थकां रेलवे री ओर ऊं टेशनां माथे भीड़ ने काबू करण सारु केरई कोशिशां।
- राज्यपाल हरिभाऊ बागडे सडक सुरक्षा अर यातायात नियमां री पालना तैय करावण सारु गाड़ियां चलावण वाळां मांय लगातार जाग जगावण माथे जोर दीनो।

000

प्रधानमंत्री नरेन्द्र मोदी आज बिहार रा भागलपुर ऊं प्रधानमंत्री किसान सम्मान निधि री 19वीं किस्त जारी कीनी। ई रा तैत नौ करोड़ 80 लाख किसानां रा बैंक खातां मांय 22 हजार 700 करोड़ रुप्या ऊं बत्ती रकम जमा करायी ज्यी। प्रधानमंत्री किसान सम्मान निधि री छठी वर्षगांठ रे मौके राख्यी ज्या ई कार्यकम मांय प्रधानमंत्री कहयो के लारला बरसां मांय सरकार री कोशिशां ऊं भारत री साखां री दिसावर मांय बिकी घणी बधी है।

.....
पीएम किसान सम्मान निधि रो राज्य स्तर रो कार्यकम जयपुर मांय राख्यी ज्यो। इण मांय मुख्यमंत्री भजन लाल शर्मा कहयो के आज प्रदेश रा 72 लाख किसानां रा बैंक खातां मांय 1400 करोड़ रुप्या ऊं बत्ती रकम भेजी ज्यी।

.....
मुख्यमंत्री प्रदेश मांय चलायी जा रही खेती—बाड़ी ऊं जुड़ी न्यारी—न्यारी योजनावां री सब्सिडी रा चैक ई किसानां ने दीना। श्री शर्मा राज्य कृषि प्रबन्धन संस्थान मांय लगायी ज्यी प्रदर्शनी देखी अर किसानां सागे बातचीत कीनी। आज प्रदेश रा सगळा जिला मुख्यालयां माथे ई ई कार्यकम रो सीधो प्रसारण करी ज्यो। पाली मांय ई रो फायदो लेवण वाळा किसान सम्मान निधि सारु प्रधानमंत्री रो आभार जतायो।

000

प्रधानमंत्री नरेन्द्र मोदी कहयो है के दुनिया भारत ओड़ी उम्मीद भरी निजरां ऊं देख रही है। वे आज मध्यप्रदेश रा भोपाल मांय ग्लोबल इच्चेस्टर्स समिट रा उद्घाटन रे मौके बोल रह्या हा। श्री मोदी कहयो के जनता ,अर्थशास्त्रियां, संस्थावां अर केरई देशां ने भारत ऊं उम्मीदां है। वे कहयो के विश्व बैंक समेत दुनिया री सगळी मोटी संस्थावां भारत ने सब ऊं तेज़ बधती माली व्यवस्था बता रही है।

.....
प्रधानमंत्री कहयो के विकसित भारत बणावण मांय कपड़ा, पर्यटन अर टेक्नोलॉजी हलका घणा खास है अर आं हलकां मांय मोटी तादाद मांय नौकरियां मिलेला।

000

विधानसभा मांय पख अर विपख सदस्यां बीचे रार हाल ई चाल रही है। आज आखा दिन हंगामा रे कारण दोपहरा पाछे 01:00 बज्यां ताँई सदन री कार्यवाही बार—बार टालणी पड़ी। कामकाज सरु व्हेतां ई 21 तारीख ऊं सदन मांय धरनो दे रह्या कांग्रेस रा विधायक वेल मांय जा र हंगामो करण लाग्या। लंच पाछे विपख रा नेता टीकाराम जूली अर कांग्रेस रा दूजा सदस्यां री ओर ऊं शुकवार रा वाकया माथे खेद जतायी ज्यो। हालांकि कुछ देर पछे कांग्रेस रा सदस्य सामाजिक न्याय मंत्री अविनाश गहलोत कानी ऊं पैली वाळी प्रधानमंत्री इन्दिरा गांधी रा बारा मांय करी ज्यी टिप्पणी सारु वां ऊं माफी मंगावण री मांग माथे अड़ ग्या। ई पाछे कांग्रेस रा सदस्य सदन ऊं बाहर निकल ग्या। वे विधानसभा भवन सामी प्रदर्शन ई कीनो। दूजी कानी दोपहरां री बगत इण ई मुद्दा माथे

कांग्रेस रा कार्यकर्ता जयपुर मांय बाइस गोदाम कने प्रदर्शन कीनो, जिण माथे पुलिस ने ज़ोर अजमाइश करणी पडी। सदन मांय विपख रा नेता टीकाराम जूली खबरनवीसा सागे बातचीत करता थकां कहया के रार खत्म करण सारु सामाजिक न्याय अर अधिकारिता मंत्री ने खेद जतावणो चाहिजे।

दूजी कानी गृह राज्य मंत्री जवाहर सिंह बेढम खबरनवीसा सागे बातचीत करता थकां कहयो के सरकार री पहल रे बावजूद विपख रा सदस्य सदन रो कामकाज चलावण मांय मदद नी कर रह्या है।

अर अब खबरां महाकुंभ ऊं -

प्रयागराज मांय चाल रहया महाकुम्भ मांय सिरकत करण सारु जावण वाळां जातरुआं रा सुबीता सारु कर्या जा रहया जतन रो रेल मंत्री अश्विनी वैष्णव खुद ध्यान राख रहया है। श्री वैष्णव खबरनवीसां सागे बातचीत करता थकां कहयो के रिजर्वेशन वाळा जातरुआ ने सीधा टेशन मांय दाखिल घेवण दिया जा रहया है, जद के बिना टिकिट मुसाफिरां ने पैली होल्डिंग एरिया मांय राख्यो जा रह्यो है।

प्रयागराज महाकुम्भ मांय सामाजिक न्याय अर अधिकारिता मंत्रालय री ओर ऊं हाल तांई बुजुर्गा ने 16 करोड़ रुप्या ऊं बत्ता मोल रा करीब एक लाख मददगार साज-ओ-सामान दिया जा चुक्या है। डिजिटल थीम माथे बणायी ज्या मंत्रालय रा मंडप मांय बुजुर्गा ने व्हीलचेयर, चालण रा गेड़या, सिलिकॉन कुशन अर बैसाखी समेत न्यारा-न्यारा साज-ओ-सामान मुफ्त मुहैया कराया जा रह्या है। मंडप मांय ट्यूलिप ब्रांड पहल रा तहत कारीगर वां रा सामान रो दरसाव अर ब्रिकी ई कर रहया है।

000

भारतीय रिजर्व बैंक-आर.बी.आई री ओर ऊं आज वित्तीय साक्षरता सप्ताह 2025 सरु करी ज्यो। इण रो मकसद लोगां मांय माली जाणकारी बधावणो है। 28 फरवरी तांई चालण वाळा ई सप्ताह रो मुद्दो “वित्तीय साक्षरता – महिला समृद्धि” है। ई दौरान बैंकां कानी ऊं बैंकिंग ऐप काम लेवण रा बारा मांय ई जाणकारी दी जावेला।

000

राज्यपाल हरिभाऊ बागडे यातायात नियमां री पालना अर सुरक्षित सफर सारु जनता मांय लगातार जाग जगावण माथे ज़ोर दीनो है। श्री बागडे आज बीकानेर मांय राख्यी ज्यी सड़क सुरक्षा कार्यशाला मांय बोल रहया हा। राज्यपाल कहयो के वाहन चलावण वाळां ने ज़रुरी सिखावण देवण सागे वां री जवाबदेही तैय करी जावणी चाहिजे।

राज्यपाल गाडियां चलावण री बगत लोगां ने नशो नी करण बाबत् ई सीख देवण री ज़रुरत बतायी। कार्यक्रम मांय सड़क सुरक्षा रा हलका मांय बेहतर काम करण वाळा 9 जणां रो मान ई करी ज्यो।

000

राजस्थान पुलिस अकादमी-आरपीए जयपुर मांय आज पुलिस अलंकरण समारोह राख्यी ज्यो। ई मौके पुलिस महानिदेशक उत्कल रंजन साहू 8 पुलिस वाळां ने केन्द्रीय गृहमंत्री पदक दे र नवाज़ा। ई सागे ई 26 अहलकारां ने डीजीपी डिस्क, 11 ने अति उत्कृष्ट अर 6 जणां ने उत्कृष्ट सेवा पदक दे र नवाज़ी ज्या। पुलिस महानिदेशक नवाज़ी ज्या सगळा पुलिस वाळां ऊं आवता बगत मांय और जोश सागे कर्तव्य री पालना करण बाबत् कहयो।

000

प्रदेश रा न्यारा-न्यारा हलकां मांय सुबह-शाम सर्दी रो असर महसूस कर्यो जा रह्यो है। सीकर अर पिलानी समेत आठ ठौड़ां न्यूनतम तापमान दस डिग्री सेल्सियस ऊं कम रहयो, हालांकि दिन री बगत पारो धीरे-धीरे चढ़बा लाग्यो है। आवता दो दिन मांय धणखर ठौड़ां दिन री बगत तापमान मांय बधोतरी रो अनुमान है। जयपुर, कोटा, उदयपुर, भरतपुर, गंगानगर, सीकर अर पाली समेत लगभग सगळी ठौड़ां दिन मांय पारो चढ़यो। राजधानी जयपुर मांय सुबह-शाम हल्की ठंडक रही

जदके दिन मांय गर्मी रो एहसास व्हयो। राज्य मांय 27 फरवरी ऊं एक मार्च तांई एक और पश्चिमी विक्षेप रा असर ऊं बादळा मंडण अर कठे-कठे हल्की बारिश रा आसार है।

000

सलूम्बर ज़िला मांय स्वास्थ्य विभाग री ओर ऊं पुलिस री मदद ऊं फर्जी डॉक्टरां रे खिलाफ करड़ी कार्यवाही सारू खास अभियान चलायो जावेला। सी.एम.एच.ओ. महेन्द्र परमार बतायो के अभियान रो मकसद डॉक्टरां रा नाम परां व्हेवण वाळी गैर कानूनी गतिविधियां माथे रोक लगावण अर जनता ने स्वास्थ्य रा बेहतर सुबीता मुहैया करावणो है।

000

बाड़मेर मांय काल रोजगार सहायता शिविर लगायो जावेला। कौशल नियोजन अर उद्यमिता विभाग री ओर ऊं लगाया जावण वाळा ई शिविर मांय संस्थानां, प्रतिष्ठानां अर दफ्तरां री ओर ऊं नौजवानां ने न्यारा-न्यारा ओहदा माथे नौकरी रा प्रस्ताव दिया जावेला।

000